

Des Allerdurchleuchtig-  
sten / Großmechtigsten Fürsten vnd Herrn  
Herrn Rudolphi / des Andern Erwöhlten Römischen  
Kaysers / auch zu Hungern vnd Behaimb Königs /  
vber das freye Exercitium Religionis Augspurgischer  
Confession, im Lande Schlesien / Allergne-  
digiste Confirmation,

Der Herrn Fürsten vnd Stende  
Abgesandten /

Dem Wolgebornen / auch Edlen Ge-  
strengen / Ehrwürdesten Hochgelehrten / Wolweisen /  
Herrn / Herrn Weigharten von Promnitz / Frey Herrn  
auff Soraw / Triebel / Pleß / Hoyerwerda / vnd Falken-  
perg: Hans Georgen von Jedlich / auff Stroppen: Sigmunden  
von Burghaus auff Stolz: Andreae Geißlern / beyder Rechten Doc-  
torn / Fürstlichem Eignitzschen / Brigieschen Rath / vnd der Herrn Für-  
sten vnd Stende in Schlesien Landts bestelten / vnd Wenzel Ottern / des  
Raths zur Schweidnitz / den Achte vnd Zwanzigsten Augusti / in  
stehenden 1609. Jahres / ertailt.



Hist. Siles.

105,22

I 6 0 9.

Voli 2/11





Maiestat vnd Priuilegium, vber  
das Freye Exercitium der Augspurgischen  
Confession, des Landes Schlesien.

**W**ir Rudolff der  
Ander/ von Gottes gnaden  
Erwöhlter Römischer Kayser/ zu  
allen zeiten Mehrer des Reichs/  
in Germanien/ zu Hungern/ Be-  
haimb/ Dalmatien/ Croatien/ vnd Selauonien/ ic.  
Khönig/ Erzherzog zu Osterreich/ Herzog zu Bur-  
gundt/ Marggraff zu Mähren/ Herzog zu Luxen-  
burg/ in Schlesien/ zu Brabant/ zu Steyr/ Kärnd-  
ten/ Crain/ Wirtemberg/ vnd Teckh/ ic. Fürst zu  
Schwaben/ Marggraff zu Lausitz/ Befürster Graff  
zu Habsburg/ zu Tyroll/ zu Pfirt/ zu Riburg/ vnd zu  
Görz/ Landgraff in Elsaß/ Marggraff des Heiligen  
Römischen Reichs ob der Ens / vnd zu Burgaw/  
A ij Herr

Herr auff der Windischen Marckh/ zu Portenaw/  
vnd Salimß/2c.

Befhennen für vns/ Vnsere Erben vnd  
nachkommende Khönige zu Behaimb/ öffentlich mit  
diesem Brieff. Demnach Vnsere getrewe vnd ge-  
horsambe/ der Augspurgischen Confession zugethane  
Fürsten vnd Stende in Ober vnd Nieder Schlesien/  
verwichener zeit durch ihre Gesandten/ Den Wolge-  
bornen/ vnd die Ehrnueste/ auch Gelärte vnd Ersame  
vnsere liebe getrewe: Weickharten von Promnitz/  
Freyherrn zu Pless auf Soraw/ Triebel vnd Honers-  
werda: Hans Georgen von Zedlitz auf Stroppen:  
Sigmunden von Burghaus auff Stolb: Andreas  
Geißlern/ der Rechten Doctorn/ vnd Benzel Ottern/  
vndter andern des Landes beschwerden/ zuförderist/  
vnd fürnemblichen/ von Vns/ als Regirendem Könige  
zu Behaimb / vnd Obristen Herzoge in Schlesien/  
aller vnderthenigist gebetten/ das sie bey der Augspur-  
gischen Confession/ dero freyen Exercitio gelassen/ vnd  
dessen von vns genugsam versichert werden möchten.  
Wir auch sie vnderm dato den 16. tag des Monats  
Decembris nechst verflommenen Jahres/ mit mehrer aus-  
führung gnedigist dahin beschieden/ Das wann ain  
jeder bey dem jenigen/ wessen erbefügt vnd berechtigt/  
verbliebe/

verbliebe/ vnd nicht dauon gedrungen würde/ wir ihnen nachmals keine vnbilligkeit zu zufügen verstaten/ sondern es in glaubens sachen aller dings bey deme/ wie es bey vnsern Hochgeehrten vorfahrn/ als Kayfers Ferdinandi vnd Maximiliani zeiten gehalten worden/ Vnd wie wir es bey vnser angehenden Regierung befunden/ in gnaden beruhen lassen wolten.

Vnd aber Vns bey dieser jetzigen Absendung/ sie ferner vnderthenigist fürbringen lassen/ das ihnen solche Resolution darumb beschwerlichen fallen wolte/ weil dieselbte Conditioniret/ vnd dardurch den Catholischen/ der Augspurgischen Confessions verwandten/ stritt zuerregen anlaß gegeben würde. Mit vnderthenigister pitte/ das in puncto Religionis/ ebener massen/ wie wir gegen vnsern Stenden des Königreichs Behaimb sub vtraq; / vns gnedigist resoluiet / auch ihnen den gehorsamben Fürsten vnd Stenden/ mit gleichmässiger satisfaction allergenedigist vns zuerzeigen/ geruhen wolten.

Wan Wir dann gnedigist angesehen/ solch vnserer gehorsamen vnd getrewen Augspurgischer Confessions verwandten/ Fürsten vnd Stende/ vnderthenigistes flehen vnd pitten/ beinebens auch wahr genommen die vilfaltige vnd grosse beschwerungen/ so wie hien vnd wieder/ also im Lande Schlesien/ aus den Religions  
A in strittige

frittigkeiten erwachsen/ vnd biß dato sich erhalten haben/ Hinfüro auch nach mehr (wo fern wie biß dieser zeit beschehen/ ain theil gegen dem andern/ sein Recht vnd Berechtigkeith/ welche sie gegen ain ander vor Alters/ wie auch vor antretung vnserer Regierung zu Stifften/ Clöstern/ Kirchen/ Consistorijs/ Renten/ Zehenden/ einkomen/ vnd allen andern zugehörungen/ siue ex prima fundatione, aut ex iure patronatus, vel alio quovis titulo/ wie solcher erdacht/ auffgesucht/ vnd herfür gezogen werden künfte/ vnd möchte/ gehabt im petitorio rügen/eisern/ des wegen ain ander turbiren/ vnd bedrängen solten) sich gar leicht erheben vnd oberhauffen möchten.

Diesem nach/ vnd damit solchem vnrath in der zeit vorkommen/ vnd wie in allen andern vnsern Rönigreichen vnd Landen/ also auch im Land Schlesiens/ vnter beyder Religionen/ Nemlich den Catholischen vnd Augspurgischen Confessions verwandten/ vnsern gehorsamen Fürsten vnd Stenden/ vnd getrewen vnterthanen/ iezo vnd allezeit standthafftige liebe/ fried/ einig: vnd vertreulichkeit/ zu aufnehmung des gemainen nutz/ gepflancket vnd erhalten/ auch für bas kein teil diser beyder bewilligten Religionen in seinem Posses vnd Exercitio bedrängt/ sondern dabey geruiglich/ ohne mennigliches einhalt gelassen werden möchte.

Als

Als haben wir in betrachtung dieser aller jetzt ge-  
setzten / vnd sonst viler andern erheblichen vrsachen /  
vnd motiuen / heuoraus / deren vns von obgedachten  
vnsern gehorsamen Fürsten vñ Stenden / in allen vnd  
jeden / die ganze zeit vnserer Kayser: vnd Königl-  
ichen Regierung vorgefallenen angelegenheiten /  
mit so standthaffter trewe / ganz nützlichist vnd willig-  
gist gelaisten diensten / welche ihre trewherzigkeit / sie  
auch nach ferners zu continuiren sich gehorsambist  
anerbitten / auff gehabt genugsamben bedacht / vnd  
mit vnsern gutten wissen vnd willen / auch zuuor mit  
vnserer Obristen Landt officirer / Landtrechtlicern /  
Edlen Rāthen / vnd lieben getrewen vnseres Königs-  
reichs Behaimb / gepflogenē reissen Rath den Articul  
die Religion betreffend / gnedigist dahin vermittelt /  
vnd beschlossen / vnd zu desto bestendiger wehrenden  
fest haltung / gedachten vnsern gehorsamen Augspurg-  
gischer Confessions verwandten / Fürsten vnd Sten-  
den / vnd getrewen Vnterthanen / solches alles mit dar-  
über ertaillung dises vnseres Kayser: vnd Königl-  
ichen offenen Maiestet Brieffs / versichert vnd bestettiget.

Erstlich / Demnach die Catholischen im Lande  
Schlesien / ihr freyes vnd vngehindertes Exercitium  
Religionis haben / in welchen ihnen die Augspurgischen  
Confessions verwandten / keinen eintrag thun / oder  
ordnung

ordnung geben/ viel mehr sie bey ihren Kirchen/ Gottes dienst/ Ceremonien/ Clöstern/ Schuelen/ Pfarren/ Stiftungen/ Zehenden/ Zinsen/ Accidentien/ einkommen vnd alten gebreuchen/ wie solches alles bis anhero vnd zu dato sie im besitz gehabt/ diser vnser Majestet/ vnd dem interdicto vti possidetis ita possideatis gemäß/ ruhig vnd ohne ver hinderung verbleiben lassen sollen vnd wollen.

Diesem nach vnd damit hiriñen aine gleichart gehalten werde/ bewilligen Wir vnd geben macht vnd recht darzu/ das die gehorsamen Fürsten vnd Stende/ vnd also alle vnd jede Einwohner des ganzen Landes des Schlestens/ sie sein vnter Geist: oder Weltlichen Fürsten/ Herrn/ Commendatorn/ auch in vnsern Erb fürstenthumern geseßen/ aufm Land/ Stetten/ vnd in Dörffern/ welche der Augspurgischen Confession verwandt sein/ vnd sich zu derselben bekennen/ keinen ausgenommen/ ihre Religion laut jetzt erwehnten Confession frey vnd vngehindert oberal/ an allen orten/ vben vnd verrichten/ bey solch ihrer Religion/ Priesterschaft vnd Kirchenordnung / welche jetzo bey ihnen ist/ oder dieser Confession gemess möchte auffgerichtet werden/ fried: vnd geruigklich verbleiben/ keiner aus denselben zu einer andern Religion/ als wie sie die bis hero gehabt/ vngeachtet/ vnter welcher Geist: oder Weltliche  
Obriß



Obigkeit ainer gefessen/ oder sich auffhalten thuet/  
gedrungen / oder derowegen veriaget / viel weniger  
bloßvnd allein der Religion halben ab officijs remou-  
ret / vnd also auff keinerley weise nach wege / in ihren  
gewissen bedrenget oder betrübet / sondern viel mehr  
alle vnd jede diser Augspurgischen Confessions ver-  
wandte / bey deroselben / auch bey allen jezo inneha-  
bende Kirchen / Gottes dienst / Ceremonien / Schulen /  
Pfarren / Clöstern / Stiftungen / Zehenden / Zinsen /  
Accidentien / einkomben / aller massen wie sie solche bis  
hero im besitz vnd gebrauch gehalten / ruhig vnd vnan-  
gefochten gelassen werden sollen.

Zum Andern / Wollen vnd ordnen Vier / das  
alles das jenige / was ain theil zu dem andern / Catho-  
lische / so wol als der Augspurgischen Confession ver-  
wandte / vor Alters / wie auch vor / vnd nach antret-  
tung vnserer Löblichen Regierung / zu Stiftern / Clös-  
stern / Kirchen / Consistorijs / Renten / Zehenden / ein-  
komben / vnd allen andern zugehörungen / siue ex prima  
fudatione, aut ex jure patronatus, aut ex alio quouis titulo  
wie solcher in petitorio erdacht / auffgesucht / oder her-  
für gezogen werden künfte oder möchte / berechtiget ge-  
wesen / oder zu sein vermainet / ganz ruhen / vnd ain  
jeder bey deme / was Er besizet / insonderheit Kirchen  
vnd Schulen / vnangesehen / wenn solche vor Alters zu  
gehöret /

B

gehöret /

//

//

11 gehört / vnd deswegen noch ihre jura patronatus darauß prætendiren möchten verbleiben / vnd deswegen kein theil das ander / mit oder außser Recht anfassien / darinnen turbiren / oder im wenigsten bedrangen soll.

Zum Dritten / Verwilligen Wir auch dieses / da jemandt aus den Fürsten vñ Stendé / außser denen Kirchen vñ Gottesheusern / welche sie jezo innehaben / halten / oder ihnen sonst zustendig sein (bey welchen sie auch friedlich geschützt / vnd erhalten werden sollen) etwa in Stedten / Stedtlein / Dörffern / oder anderswo / wolte oder wolten mehr Kirchen / Gottesheuser oder Schulen / zu Vnterweisz : vnd auffziehung der Jugendt auffrichten vnd bawen lassen / das solches gleich wie den Fürsten vnd Herrn Standt / vnd derselbten allerseits Vnterthanen / also auch den Erb Fürstenthümern / so wol in Stedten als auf dem Lande in gemein vnd einem jeden insonderheit / an jezo vñ in künfftig zuthun / frey vnd offen stehen soll / vor meniglich vngehindert.

Zum Vierden / Wöllen wir auch den Augspurgischen Confessions verwandten Fürsten vnd Stenden diese sondere gnad thun / das die jennigen Fürsten / so zu zeiten vnserer Hochgeehrten Herrn Anherms vnd Herrn Batters / auch bey antrittung vnserer Regierung / ihre Consistoria gehabt / vnd bis dato erhalten /  
Dabey

Dabey nun vñ hin furo allezeit vor menntglich vnbetro-  
ret sein vnd bleiben/auch das denen andern Augspur-  
gischer Confession/Fürsten vnd Stenden/ so hiebevor  
keine Consistoria gehabt/newe auffzurichten/vnd aller //  
massen mit denselben/wie die andern/so die ihrige biß  
hero gehalten/ in ordination vnd Ehesachen zuuorfa-  
hren frey stehen soll.

Dabey wier dann insonderheit den ErbFürsten-  
thumbern gnedigist frey stellen/ das sie es in ordinatio-  
nibus/wie vor disem beschehen/in künfftig halten/vnd  
die Pfarrer ordiniren lassen/ In Ehsachen aber sich  
entweder der Consistorien/ der Augspurgischen Con-  
fessions verwandten Fürsten vnd Stende in Schles-  
sien gebrauchen/ oder aber durch die Hauptleuthe vnd  
die vom Lande darzu verordnete Personen/Augspuro-  
gischen Confession/an einem gewissen ortho/ein Gene-  
ral Consistorium auffrichten mögen. Jedoch auf vnser  
gnedigiste Ratification/ so innerhalb etnes Monats/  
nach beschehenem ihrem gehorsambistē anbringen/er-  
folgen/oder in verbleibung dessen/wie es aufgerichtet/  
gehalten/vnd von ihren deputirten ohne allen eintrag  
dirigiret werden soll. Dahin dann sie alle vnd jede  
Ehesachen remittiren mögen/ mit diesem ausdrückli-  
chen vorbehalt/das in erwehneten Heyrats: vnd Ehes-  
sachen/wie bey diesem/also auch in allen andern Con-

B ij

istorien/

historien/ fleissig auffacht gegeben werde/ damit nie-  
mandt zu nahe mit dem geblütte sich vermische / vnd  
da es je beschehen solte / doch der modus coercendi &  
pun:endi aller massen/ wie es im Heyligen Römischen  
Reich / vnter den Augspurgischen Confessions ver-  
wandten/ vnd deren wolbestelten Consistorijs/ in vblis-  
chen brauch bis hero gehalten/ obseruiet werde.

Zum Fünfften/ sollen die Begrebnis Todter Leich-  
nam/ in Kirchen vnd auff Kirchhöffen/ wie auch das  
Ausleutten den jenigen/ so dazu gepfarret/ nicht ab-  
geschlagen / Gleichwol aber bey den Catholis-  
schen Kirchen vnd Pfarren/ den Augspurgischen Con-  
fessions verwandten/ anders nicht/ den vermöge derer  
daselbten gebreuchlichen Ceremonien/ Hin wiederumb  
auch den Catholischen/ bey des andern theils Pfar-  
ren ebener gestalt zugelassen/ vnd ertailt werden/  
Vnd da es je beschehe/ vñ den eingepfarreten/ die zur  
zeit/ so gestalten verweigerung gebürende/ vñ sonst zur  
Kirchen oder Pfarr schuldige Kent vnd Decem zuent-  
richten entnommen/ vnd ihre Obrigkeiten dieselben zu  
einer andern Pfarr / da es ihr gefellig zuuerwenden/  
vnd da selbst sie begraben zulassen befügt sein.

Wegen frembder Personen vnd laichen aber/ soll  
dieses alles mit des Collatoris/ oder Pfarrers selbigen  
orts/ guten wissen vnd willen verrichtet werden. In  
welchen

welchen orten aber vnd Stedten / die jenigen so der  
Augspurgischen Confession sein / ihr aigne Kirchen vñ  
Begrebnüs / oder gesambt mit den Catholischen nicht  
hätten / dieselben sollen vermöge dieser vnser Concel-  
lion / wie Kirchen vnd Gottshäuser / also Begrebnüs  
vnd Kirchhöfe auffzubawen / auch stellen darzu aus-  
zusetzen macht haben.

Auff das also hierin zum Sechsten vilgedachten  
vnsern gehorsamben Fürsten vnd Stenden / auch al-  
len andern vnsern im Herzogthumb Schlesien / vnd  
vnserer darin habende Erb Fürstenthumben getrewo-  
en Vnderthanen vnd Einwohnern / nicht etwas ver-  
hinderliches sein möge / So thun wier hiemit alle  
Beuehlich vnd Mandata / welche vor diesem wieder die  
Augspurgischen Confessions verwandte / in specie aber  
die jenigen / so wegen verpottener graduum in Heyra-  
ten vnd andern in puncto Religionis ausgegangen sein / in  
gegenwertig gantzlich auffheben vnd Cassirn.

Letztlich wollen Wir auch dieses / das zu erhaltung  
lieb vnd ainigkeit / eine part der andern / Catholische /  
so wohl als der Augspurgischen Confessions verwand-  
te / in so / wie vor gesetzt verwilligter vbung vnd  
gebrauch ihrer Religion / Kirchenordnung vnd erteil-  
ten gerechtigkeiten / nicht eingreifen oder fürscreiben /  
die Geistliche in Weltliche / vnd hinwieder die Welt-  
liche

B ij

liche

liche in Geistliche Ambter sich nicht einmischen /  
Ziel weniger ein ander schmehen nach verfolgen / son-  
dern nun mehr als glieder zu einē corpore gehörig ein-  
ander lieben / Ehren / fördern / vñ beyderselts für einen  
Mann / in allen vnsern vnd des Vatterlands nottur-  
fften / vnd angelegenheiten / es sey in Mitleidun-  
gen / oder andern vnuermeidlichen zufellē / beysam-  
men als trewe Freunde stehen. Vnd in summa also  
von heutiges tages dato an / keiner von dem andern /  
wie aus den Fürsten / Herrn / vnd Stenden / also  
auch den Stedten / Stedtlein vnd Pawers volckh /  
weder vō ihren Obrigkeiten / nach von keinem ainzigen  
andern Geist: oder Welchliches Standes Personen /  
wegen der Religion bedrenget / vnd zu einer andern /  
es sey durch gewalt / oder anderer vnzimlicher weise /  
gezwungen vnd abgefūret werden.

Welches alles vnd jedes wie jetzt erzehlet / ver-  
willigen / versichern / vnd bestettigen wir hie mit aus  
Regirender Khöniglicher Behmischer vollkommens-  
heit / macht vnd gewalt / vnd als Obrister Herzog in  
Schlesien / Mainen / setzen vnd wollen / bey vnsern Kö-  
niglichen wortten versprechendt / das viel erwehnte  
vnserer Augspurgischer Confessions verwandte Fürsten  
vnd Stende / sambt andern obberürten vnsern deren  
orth / Landen vnd Erbfürstenthumben / getrewen Vn-  
tertha.

terthanen vnd Einwohnern / für sich vnd ihre nach-  
kommen / bey allem dem was obgesetzt / von vns  
auch künfftigen Königen zu Behaimb / vnd Obri-  
sten Herzogen in Schlesien / bis zu einer Christlichen /  
volkommlichen vnd entlichen verainigung wegen der  
Religion / im Heyligen Römischen Reich / ganz vnd  
volkömmlich / in fried vnd ruhe gelassen / vnd gleich aus-  
dern bey dem Religions frieden des Heyligen Römis-  
schen Reichs erhalten / das geringste ihnen hirm /  
weder von vns / nach wie obgedacht / all vnsern nach-  
kommen / oder aber von andern Geist: oder Weltli-  
chen Personen / zu künfftigen vnd jeden zeiten / einige  
verhinderung oder eintrag nicht geschehen / nach ver-  
stattet / weniger wieder solchen Religions frieden / vnd  
diese vnserre Assecuration ainzige beuellich / oder etwas  
dergleichen / so dessen geringste verhinder: oder verän-  
derung verursachen möchte / von vns oder mehr er-  
wehntē vnsern nachkomē / oder aber sonsten jemandts  
andern ausgehen / oder von jemandts anzunehmen  
angehalten / Vnd im fall gar etwas dergleichen aus-  
ginge / oder von jemanden angenommen würde / jedoch  
vntressig sein / vnd da für gehalten / auch auff solche  
gestalt / weder mit oder ohne recht / ichtwas geurteilt  
vnd ausgesprochen werden soll.

End

Vnd gebitten darauff vnsern Ober: vnd allen andern Hauptleuten/in Ober vnd Nieder Schlesien/ das sie gemelte vnserer gehorsame Fürsten vnd Stende/sampt allen andern hierin Vermelt vnsern getrewen Vnderthanen vnd Einwohnern in Ober: vnd Nieder Schlesien/ so sich zu vielberürter bewilligter Augspurgischer Confession bekennen/ bey dieser vnserer versicherung vnd Maiestet/wie dieselbte in allen Articulu/ Sentenzen/vnd Clausuln lautet/ vertreten vnd schutzen/ selbst ihnen hierin keinen eintrag thun/ viel weniger andern zuthun verstaten. Vnd wo vber diß jemandt/ es sey von Geist: oder Weltlichen Personen / diese vnserer Assuration vnd Maiestat zuuertreten sich vnderstände/ zu deme vñ einem jeden derselben/als zu einem zerstörer des gemainen friedens/ an statt vnserer/ vnd ihres von vns oder mehes erwehnet vnsern nachkommen/ihnen anuertrauten Ambshalben greiffen/vnd also vielermelte vnserer gehorsame Fürsten vnd Stende/ festiglich schutzen/beschirmen/vnd vertaidigen sollen.

Vnd dis alles bey vermeidung vnserer/ vnserer nachkommen/ vnd künfftigen Regierenden Königen zu Behaimb/ auch Obristen Herzogen in Schlesien zorns/ schwerer straff vnd vngnade. Alles getreulich vnd vngesherlich. Vhrkündtlich vnd vmb meherer  
sicherheit



sicherheit willen/ mit vnserm Kayser: vnd Rhöniglts  
chen anhengenden grössern Insigel bekräftiget. Ge-  
ben auff Vnserm Rhöniglichen Schlos Prag/ den  
Zwanzigsten Tag des Monats Augusti. Nach Chris-  
tu vnserß lieben Herrn vnd Seligmachers Geburth/  
im Ein tausent/ Sechshundert vnd Neunten Jahre.  
Vnserer Reiche des Römischen im Vier vnd Drenß-  
sigisten/ des Hungerischen im Sieben vnd Drenßis-  
gisten/ vnd des Behemischen auch im Vier vnd  
Drenßsigisten Jahre.

Rudolff.

*Adamus de Sternbergk  
Supremus Burggrauus  
Pragensis.*

Ad mandatum Sacrae Cæs.  
Majestatis proprium.

*Paulus Michna.*



Handwritten text at the top of the page, likely bleed-through from the reverse side. The text is mirrored and difficult to decipher but appears to contain the name of the printer or publisher.

Handwritten text at the bottom of the page, likely bleed-through from the reverse side. It appears to be a name, possibly 'Paulus Richter'.



Gedruckt in der Alten Stadt Prag/  
bey Jonatan Bohutsky/ bey der Brucken  
neben dem Zollhaus

4. Tag des Monats Septembris.

Anno M. DC. IX.





Verzeichnis der Bücher in der Bibliothek  
des Königl. Hofes zu Dresden  
in dem Jahr 1706

4. Teil des Verzeichnisses

Anno M. DC. IX.

